

# BOLETÍN SOBRE RESPONSABILIDADE SOCIAL DA Universidade de Vigo

MAIO 2017

PUBLICACIÓN ELECTRÓNICA MENSUAL ELABORADA POLA UNIDADE DE ANÁLISES E PROGRAMAS

## Os Martes Saudables pasan revista ao campus

No posto instalado no centro, ofrecíase información sobre saúde, nutrición, deporte e sexualidade



### Duvi | Pontevedra

Información sobre nutrición, sexualidade ou sobre os diferentes servizos da Área de Benestar, Saúde e Deporte da Universidade, xunto á posibilidade de coñecer a tensión arterial, o índice de masa muscular ou os niveis de colesterol. Os Martes Saudables achegaron de novo ao campus un amplo abano de opcións para que a comunidade universitaria puidese coñecer e mellorar o seu estado de saúde. [Máis información](#)

## Deputación e Universidade selan un novo acordo para impulsar a mobilidade do alumnado

O ente provincial destina 100.000 euros a bolsas para o estudantado participante no programa Erasmus+



### Duvi | Pontevedra

A presidenta da Deputación de Pontevedra, Carmela Silva, e o reitor da Universidade de Vigo, Salustiano Mato, asinaron este mércores no Pazo Provincial un convenio de colaboración polo que o ente provincial desetina 100.000 euros á promoción da mobilidade do alumnado dos campus de Vigo e Pontevedra. [Máis información](#)

## Búscase proxecto de investigación centrado no colectivo de maiores

O prazo de presentación está aberto ata o 16 de xuño



### Duvi | Ourense

O pasado mes de febreiro tivo lugar a sinatura dun convenio marco de colaboración entre a Universidade de Vigo e a Fundación Dorzán, institución privada sen ánimo de lucro centrada no colectivo da terceira idade. Entre as primeiras medidas contempladas estaba entón a convocatoria dunha bolsa de investigación co obxectivo de facilitar apoio económico para a realización de traballos científicos na área de atención ás persoas maiores. [Máis información](#)

## Máis de 85 persoas asistirán ás Xornadas de fundraising para a promoción do mecenado universitario

A cuarta edición desta cita desenvolverase este xoves e venres na Fundación Barrié



### Duvi | Vigo

A cuarta edición das [Xornadas de fundraising para a promoción do mecenado universitario](#) arrancan mañá xoves da Fundación Barrié de Vigo coa participación de máis de 85 persoas. Nesta nova edición da cita organizada pola Reitoría da Universidade de Vigo en colaboración co Consello Social e a Conferencia de Consellos Sociais está marcada pola internacionalización. [Máis información](#)

## Menores con dereitos pero tamén con responsabilidades

A actividade culminou a programación deste curso da iniciativa Caso Acoso



### Rosa Tedín | Ourense

O pasado mes de decembro, a Delegación de Alumnos da Facultade de Dereito do campus de Ourense puxo en marcha unha iniciativa que baixo o nome de [Caso Acoso](#) tiña como obxectivo loitar contra o acoso escolar. Para acadalo, estudantes hoxe universitarios volveron ás aulas de Educación Secundaria Obrigatoria de centros da cidade para contribuír a que o alumnado fose consciente do que supón esta forma de violencia... [Máis información](#)

## Aprendendo a consumir enerxía dun xeito máis sustentable

A actividade está organizada por Amigos da Terra en colaboración co centro



### Duvi | Ourense

O mércores 10 de maio, a Facultade de Ciencias do campus de Ourense acollerá o taller [A túa enerxía pode cambialo todo!](#). A cita está organizada por Amigos da Terra en colaboración co centro co obxectivo de amosar aos participantes cousas que poden facer na súa vida cotiá para frear o cambio climático e impulsar unha nova economía arredor da enerxía. Con esta iniciativa, a asociación ecoloxista quere amosar ás persoas interesadas pasos sinxelos que poden levar a cabo e que contribúen "a cambiar cara un modelo que aposte polas enerxías renovables, polo aforro e o uso intelixente da enerxía". [Máis información](#)

## CC da Educación e do Deporte achégase á realidade silenciada da mocidade transexual

A escritora Eva Mejuto e Éric Dopazo, da asociación Arelas, compartiron un coloquio co alumnado



### Eduardo Muñiz | Pontevedra

"A min facíanme sentir mal por ser diferente. Aposto a que a moitos de vós tamén", apuntaba o mozo transexual Éric Dopazo ao alumnado da Facultade de Ciencias da Educación e do Deporte, que este xoves acolleu o faladoiro *(Trans)formando o mundo*, un ciclo de actividades promovidas polo Concello para dar visibilidade á realidade das persoas transexuais. [Máis información](#)

## Os Libros Salvavidas recadan 8000 euros para os refuxiados de Lesbos

Os cartos serán doados á ONG Proem-Aid



**M. Del Río | Vigo**

A iniciativa Libros Salvavidas, posta en marcha a pasada semana polos traballadores da Biblioteca Universitaria nos tres campus, baixou onte mércores o pano tras recadar máis de 8000 euros. Os sete días de mercados solidarios de libros nos centros, as bibliotecas e o Centro Comercial de Cidade Universitaria permitiron acadar unha cifra que os propios impulsores cualifican de "increíble vendendo libros a 10, 5, 2 ou mesmo 1 euro", como destaca Paz de la Peña, .... [Máis información](#)

## O cooperativismo e o traballo en rede como camiños vitais e profesionais

No centro tivo lugar tamén unha actuación do 'Proxecto Alien' de Vertixe Sonora



**Eduardo Muñiz | Pontevedra**

Achegar ao alumnado que se atopa a piques de rematar os seus estudos a diferentes vías nas que desenvolver "o seu proxecto vital e persoal despois da carreira" é o propósito dos coloquios que integran *En torno ao proxecto*, unha actividade que toma o relevo das charlas preprofesionais que cada ano se viñan desenvolvendo no centro co propósito de amosar ao alumnado que "ademais de enviar currículos ou facerse autónomos,

existen outras moitas vías intermedias, como o cooperativismo ou o desenvolvemento de proxectos culturais", explica a decana, Silvia García. [Máis información](#)

## Igualdade organiza a segunda edición do curso 'Muller e saúde'

O prazo de inscrición finaliza o 11 de maio e as clases comezarán o vindeiro luns



**Inés Tornero | Vigo**

Xunto cos factores biolóxicos diferentes e cos axentes sociais que inflúen de maneira inxusta na saúde das persoas, o benestar específico das mulleres é un tema que, moitas veces, queda esquecido. Ante esta realidade, a Unidade de Igualdade organiza, por segundo ano consecutivo, o curso *Muller e saúde*, dirixido especialmente ás mulleres. [Máis información](#)

## Pequenos 'investigadores' dando leccións de metodoloxía científica

Á sesión asistiron estudantes de Ciencias da Educación



**Rosa Tedín | Ourense**

Como xa vén sendo tradición nos últimos anos, a Facultade de Ciencias da Educación do campus de Ourense acolleu este xoves a visita dun grupo de estudantes do Colexio Guillelme Brown, do Concello de Pereiro de Aguiar, co obxectivo de que explicasen en primeira persoa aos futuros docentes como traballan eles nas aulas co método científico.

[Máis información](#)

## O Siope recibe un premio nacional ás boas prácticas polo curso de formación de orientadores

Celebrado en marzo, estaba destinado ao persoal que asesora o alumnado dos institutos de secundaria



### Duvi | Vigo

A Sección de Información, Orientación e Promoción do Estudiantado (Siope) puxo en marcha en 2016 un curso en liña para orientadores de secundaria e de formación profesional. A boa aceptación desta iniciativa entre o persoal dos institutos fixo que neste 2017 se organizase unha segunda edición, co obxectivo achegar toda a información posible ás persoas que levan a cabo tarefas de asesoramento nos centros de ensino secundario, ... [Máis información](#)

## Unha panorámica da arte feminista galega na que BBAA é protagonista

A mostra reúne as creacións de Yolanda Herranz, Mar Caldas, Xoán Anleo ou Chelo Matesanz



### Eduardo Muñiz | Pontevedra

Dar visibilidade ás prácticas artísticas feministas que se veñen desenvolvendo en Galicia desde a década de 1990 ata a actualidade é o propósito central de [Alén dos xéneros](#), a exposición comisariada por Ánxela Caramés que nestes meses pode visitarse no Museo de Arte Contemporánea de Vigo (Marco). Unha selección de obras de 50 artistas integra unha mostra que indaga na pluralidade de temáticas abordadas desde a arte feminista, reunindo proxectos tanto de artistas xa consolidadas cos das novas xeracións de creadores e creadoras, boa parte delas formadas na Facultade de Belas Artes, ... [Máis información](#)

## Cidadanía global e diversidade cultural para facer do Proxecto Atlántico un faro da Unesco

Os investigadores Miguel Cuevas e Laura Redondo coordinan dous dos grupos de traballo do encontro




### Eduardo Muñiz | Pontevedra

Desde 2015, profesorado da rede de escolas asociadas á Unesco de Galicia, Portugal e Cabo Verde vén traballando no Proxecto Atlántico, unha iniciativa que busca xerar unha comunidade educativa a ambas beiras do océano que traballe conxuntamente nos eixos da sustentabilidade, a diversidade cultural e a idea dunha cidadanía global. [Máis información](#)

## A semana de recollida de RAEs reúne máis dun cento de obxectos

Móviles, cargadores e cables foron os elementos presentes en maior número nesta campaña



### Eduardo Muñiz | Pontevedra

Numerosos móviles, cables ou cargadores, pero tamén impresoras, pantallas, ordenadores, altosfalantes ou electrodomésticos remataron a pasada semana nas caixas emprazadas nos diferentes centros e instalacións do campus de Pontevedra. No marco do proxecto Green Campus, a Vicerreitoría promoveu entre o 8 e o 12 de maio a cuarta edición da Semana de Recollida de RAEs (Residuos de Aparatos Eléctricos e Electrónicos), que permitiu reunir máis dun cento de obxectos, que coa colaboración da Oficina de Medio Ambiente da Universidade, serán trasladados a un xestor autorizado para o seu tratamento.

[Máis información](#)



## Igualdade promove 15 proxectos cos que espallar a perspectiva de xénero entre o alumnado

A directora da unidade lamenta a falta de solicitudes procedentes dos ámbitos científico e tecnolóxico



### D. Besadío | Vigo

A Unidade de Igualdade subvenciona este ano 15 actividades docentes que promoven a perspectiva de xénero e que se van levar a cabo nos tres campus. "A convocatoria destas axudas comeza a estar consolidada como unha forma de integrar a perspectiva de xénero na actividade docente e hai profesorado que xa organiza a súa docencia tendo en conta esta convocatoria", explica Anabel González Penín, responsable da unidade, ...

[Máis información](#)

## Alumnado de secundaria descobre 'en galego' os principais recursos naturais de Galicia

Nunhas charlas impartidas no concello por titulados da Escola de Enxeñaría de Minas e Enerxía



### D. Besadío | Vigo

Achegar a ciencia e a enxeñaría ao estudantado de secundaria e facelo empregando como vehículo transmisor o galego. Esta é a idea coa que os servizos de normalización lingüística da Universidade e do Concello de Vigo puxeron en marcha unha serie de charlas dirixidas, precisamente, a amosar ao alumnado dos institutos vigueses que en Galicia se fai ciencia e que, ademais, faise en galego. [Máis información](#)

## 150 representantes de asociacións de apoio ao alumnado estranxeiro reuniranse a vindeira semana no campus

Dende o venres 2 e ata o domingo 4, sendo esta a terceira ocasión en este evento ten lugar en Vigo



### Duvi | Vigo

A rede de asociacións de apoio ao alumnado de intercambio, a Erasmus Student Network, regresa ao campus de Vigo para celebrar a súa reunión anual. Os próximos 2, 3 e 4 de xuño preto de 150 estudantes voluntarios das universidades españolas e doutros países europeos daranse cita no campus para debater sobre acordos institucionais, ... [Máis información](#)

## Oito unidades da Universidade de Vigo xa dispoñen de cadansúa carta de servizos

Noutras seis, estes instrumentos de mellora do servizo están en de fase implantación



### Mª del Carmen Echevarría | Vigo

As cartas de servizos aparecen recollidas na lexislación de transparencia como un elemento útil e necesario para a rendición de contas na xestión das administracións. A día de hoxe, oito unidades da Universidade de Vigo contan con cadansúa carta de servizos, mentres noutras seis están en fase de implantación, co obxectivo de consolidarse como ferramentas eficaces de comunicación, tanto interna como externa, e difusión das súas actividades, permitíndolles ademais plasmar prazos e tarefas non previstas nas

normativas a prol dun servizo máis eficiente. [Máis información](#)

## Xogar, relacionarse e aprender idiomas grazas ao deporte

O programa está coordinado por estudantes Erasmus en prácticas



### Duvi | Vigo

Aprender idiomas, integrarse, facer amigos, pasalo ben e practicar deporte, en iso consiste a iniciativa *Train and Talk*, levada a cabo dende a Área de Benestar, Saúde e Deporte, na que este ano colaboran as alumnas Saskia Jyx e Eglé Markelionyté, que realizan na Universidade de Vigo a súa estadía como Erasmus+. Chegadas de Alemaña e Lituania respectivamente, as estudantes organizan cada quince días, actividades deportivas de equipo nas que se poden anotar os e as estudantes que o desexen para, ademais de xogar e poñerse en forma, practicar idiomas

nun ambiente relaxado. [Máis información](#)

## Máis de 300 escolares amosarán as súas dotes científicas na EE Forestal

Estudantes de oito colexios presentarán os seus proxectos a un xurado integrado por docentes do campus



### Eduardo Muñiz | Pontevedra

Máis de 300 escolares, pertencentes a oito centros educativos de Pontevedra, xunto con nove familias, participarán este venres e sábado na Escola de Enxeñaría Forestal na fase final de Pontenciencia, unha iniciativa promovida polo Concello de Pontevedra xunto coa Universidade e financiada pola Fecyt dirixida a achegar a ciencia ao alumnado de Primaria. [Máis información](#)